



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25

Vogošća, 29.08.2025. godine

VIJEĆNIČKA PITANJA
POSTAVLJENA NA 9. REDOVNOJ SJEDNICI OPĆINSKOG VIJEĆA VOGOŠĆA
održanoj 28.08.2025. godine

Vijećnik **Pašagić Almir** (u ime Kluba vijećnika **SDP**) postavio je slijedeća vijećnička pitanja:

9/1. Razočarani roditelji učenika OŠ „Zahid Baručija“ pitaju nadležnu službu Općine Vogošća zašto nije urađen tehnički prijem dograđenog dijela na školi. Obzirom da je nadogradnja OŠ „Zahid Baručija“ trajala dugi vremenski period i da je sam rok završetka probijen jednu godinu dana, sada kada su radovi završeni djeca treba da uđu u nove prostorije sa početkom ove školske godine (01.09.2025.), zbog neažurnosti aktuelne službe Općine Vogošća nije urađen tehnički prijem nadograđenog dijela škole. Prema relevantnim informacijama zahtjev za tehnički prijem je predat prije 15 dana, a nadležna služba nije odradila svoj posao. Roditelji i djeca su razočarani i tužni zbog neblagovremenog obavljanja nadležne službe općine Vogošća koja je bila obavezna uraditi ovaj posao bar do početka školske godine.

9/2. Kada će u općini Vogošća početi projekat postavljanja individualnih solarnih ploča na privatnim kućama, a koje će finansirati Općina Vogošća. Mnoga domaćinstva su zainteresovana za ovaj projekat, jer se u prethodnom periodu stanovništvo anketiralo, ali do sada nije bilo nikakvih aktivnosti.

Vijećnik **Efendić Emir** (u ime Kluba vijećnika **S BiH**) postavio je slijedeća vijećnička pitanja:

9/3. Postavljam pitanje nadležnoj službi s ciljem ukazivanja na zabrinjavajuće stanje pomoćnog stadiona „Hakija Mršo“ koji uprkos svojoj namjeni nije stavljen u funkciju svoje primarne uloge sportskih aktivnosti, prvenstveno fudbala. Naime, umjesto da služi sportistima i rekreativcima, navedeni prostor se koristi kao improvizirani parking za motorna vozila, čime se narušava njegova svrha i doprinosi njegovom daljnjem propadanju. Takva praksa ne samo da obesmišljava ulaganja u sportsku infrastrukturu, već i šalje poruku o zanemarivanju potreba lokalne zajednice. Dodatno, pomoćni stadion je zarastao, na njemu se nalazi odložen otpad od vještačke podloge koji je problematičan sa ekološkog i okolinskog aspekta. Postavlja se pitanje zašto je pomoćni stadion u zapuštenom stanju, zašto otpad nije uklonjen i zbrinut, te ko snosi odgovornost za navedeno. Očekujemo da nadležni poduzmu konkretne korake u cilju:

- vraćanja pomoćnog stadiona njegovoj sportskoj funkciji,
- uklanjanja nepropisno odloženog otpada,
- te osiguravanja da se sportski objekti koriste u skladu s njihovom namjenom, na zadovoljstvo svih građana.

9/4. Postavljam pitanje nadležnoj Općinskoj službi s ciljem ukazivanja na problem neefikasnosti rada u šalter sali, koji u posljednje vrijeme izaziva sve veće nezadovoljstvo građana. Naime, primjećeno je da se svakodnevno formiraju dugi redovi građana koji čekaju na predaju zahtjeva i ovjeru dokumenata u šalter sali Općine Vogošća. Ovakva situacija ostavlja dojam da administracija ne vrši funkciju na najefikasniji način, što dodatno opterećuje građane. Stoga se postavlja pitanje: da li je moguće reorganizirati rad općinske administracije na način koji bi omogućio bržu i kvalitetniju uslugu građanima. Konkrentno, predlaže se razmatranje mogućnosti raspredijavanja većeg broja službenika u šalter salu, kako bi se ubrzao proces obrade zahtjeva i smanjilo vrijeme čekanja. Vjerujemo da bi ovakva mjera doprinijela boljoj funkcionalnosti općinskih službi, te povećala zadovoljstvo građana.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

9/5. Postavljam pitanje BAGS ENERGOTEHNIKA Vogošća – kao isporučiocu toplotne energije na području Općine Vogošća i Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo, a pitanje glasi: Članom 18. Uredbe o opštim uslovima za proizvodnju i isporuku i korištenje toplotne energije je precizno definisano da „termoenergetska postrojenja i instalacije davaoca usluge i korisnika usluge trebaju da pogonski budu spremni od 20. septembra do 15. maja“. Dakle, u konkretnom slučaju davaocu i isporučiocu toplotne energije na području Općine Vogošća društvo BAGS ENERGOTEHNIKA ostalo je nekih cca. 3 sedmice da mora imati spremna pogonska postrojenja za isporuku toplotne energije. Poučeni iskustvom od prošle grijne sezone 2024/25 kada građani Općine Vogošća koji koriste grijanje od BAGS-a nisu isto imali veći dio zimske grijne sezone, molim da mi se u što kraćem roku u pisanoj formi dostavi od gore traženih institucija precizni odgovori i to:

- Da li su termoenergetska postrojenja isporučioca toplotne energije BAGS ENERGOTEHNIKA spremna u skladu sa članom 18. gore navedene Uredbe.
- Da li je BAGS ENERGOTEHNIKA obezbjedio neophodne količine mazuta za grijnu sezonu 2025/26.
- Da li je Vlada Kantona Sarajevo kao većinski vlasnik isporučioca usluga putem resornog ministarstva obezbjedila neophodna budžetska sredstva za nabavku mazuta za predstojeću grijnu sezonu.
- Ukoliko su obezbjeđena budžetska sredstva od strane osnivača, da li je BAGS ENERGOTEHNIKA blagovremeno proveo postupak javne nabavke za nabavku energenta/mazuta.

9/6. Uzimajući u obzir skromne budžetske kapacitete naše lokalne zajednice, ali i značaj koji u oblasti kulture, sporta i informisanja imaju Javna ustanova Kulturno-sportski centar Vogošća i Javno preduzeće RTV Vogošća, postavljam sljedeće vijećničko pitanje nadležnoj službi općine Vogošća: Da li su od strane općinskih službi ili nadležnih upravnih tijela razmatrani modeli djelotvornije organizacije, saradnje ili racionalizacije između JU „Kulturno-sportski centar“ Vogošća i JP RTV Vogošća, s ciljem povećanja funkcionalnosti, smanjenja operativnih troškova i jačanja finansijske stabilnosti obje ustanove, uz očuvanje njihove javne funkcije i uloge. Također, da li postoji procjena da li je postojeći organizacijski model (dvije odvojene institucije) najefikasniji za lokalne potrebe, ili bi se kroz bolju koordinaciju, dijeljenje resursa, zajedničke projekte ili čak institucionalnu transformaciju mogla postići dugoročno održivija rješenja. U kontekstu stalnih budžetskih izazova i potrebe za jačanjem javnih servisa, smatram da je ovo pitanje izuzetno važno, te molim da se eventualne analize, planovi ili prijedlozi po ovom pitanju dostave Općinskom vijeću na uvid.

Vijećnica **Karović Amra (u ime Kluba vijećnika SDP)** postavila je slijedeće vijećničko pitanje:

9/7. Kada će se realizirati postavljanje stacionarnog radara na onoj putnoj relaciji Poturovići-Vogošća, jer je inicijativa ocjenjena kao opravdana.

Vijećnik **Turković Faruk (u ime Kluba vijećnika SDA)** postavio je slijedeća vijećnička pitanja:

9/8. Planirana dinamika i faze rekonstrukcije/sanacije pasarela u Hotonju i na Kobiljoj Glavi. U cilju pravovremenog informisanja građana i podrške aktivnostima Općine na unapređenju komunalne infrastrukture, postavljam slijedeće vijećničko pitanje:

S obzirom na to da su pasarele na lokacijama Hotonj i Kobilja Glava od velikog značaja za sigurnost pješaka i protočnost saobraćaja, interesuje me:

1. Da li Služba ima izrađen plan ili projektnu dokumentaciju za rekonstrukciju ili sanaciju navedenih pasarela?
2. Koja je planirana dinamika i koje su faze realizacije eventualnih radova, ukoliko su planirani u tekućoj ili narednoj godini?
3. Da li su u okviru Budžetu Općine Vogošća za 2025. godinu planirana sredstva za ovu namjenu, te postoji li mogućnost sufinansiranja od strane Kantona Sarajevo ili drugih nadležnih institucija?

Cilj ovog pitanja je da građanima pružimo pravovremene i tačne informacije o statusu planiranih aktivnosti, kao i da zajednički doprinesemo boljoj koordinaciji između Općine, mjesnih zajednica i građana.

9/9. Dinamika završetka i usvajanja Urbanističkog plana Kantona Sarajevo. Obraćam se Službi za urbanizam Općine Vogošća, uz molbu da se ovo pitanje proslijedi Zavodu za planiranje razvoja Kantona Sarajevo, s obzirom na njihovu ključnu ulogu u procesu izrade Urbanističkog plana Kantona Sarajevo. S obzirom na značaj Urbanističkog plana Kantona Sarajevo za razvoj naše općine, ali i čitavog Kantona, interesuje me:

1. Po kojem osnovu su prilikom izrade Urbanističkog plana planeri/inžinjeri pojedinačne manje katastarske čestice po namjeni dijelili u dvije različite namjene zemljišta. Logično bi bilo da jedna katastarska čestica ima jednu namjenu.
2. U kojoj fazi se trenutno nalazi proces izrade Urbanističkog plana Kantona Sarajevo.
3. Kada možemo očekivati završetak izrade prijedloga i upućivanje dokumenta na usvajanja od strane Skupštine Kantona Sarajevo.
4. Da li postoji okvirni plan aktivnosti i rokovi za finalizaciju procesa, odnosno slanja prijedloga na usvajanje u Skupštinu Kantona Sarajevo, kako bi se omogućilo nesmetano planiranje i realizacija novih investicija.

Naglašavam da trenutno nepostojanje usvojenog Urbanističkog plana i loša rješenja iz starog, stvaraju određene prepreke za potencijalne investitore i razvojne projekte na području naše Općine, te smatram da je od izuzetnog značaja da građani i privredni subjekti budu informisani o narednim koracima i predviđenim rokovima.

Vijećnica **Šabić Dalia (u ime Kluba vijećnika DF)** postavila je slijedeće vijećničko pitanje:

9/10. Na osnovu više upita i pritužbi građana koji žive u ulici Nova željeznička stanica, postavljam pitanje upućeno nadležnoj općinskoj službi: kada će biti izvršeno postavljanje ležećih policajaca u ovoj ulici, s obzirom na to da su prošle godine vršena mjerenja, a ista su ponovljena i prije tri mjeseca. Stanovnici ističu da se ovom ulicom svakodnevno vozi velikim brzinama, a tokom večernjih i noćnih sati, ista često postaje mjesto divljih trka, naročito u pravcu prema Svrakama, čime se direktno ugrožava sigurnost građana, djece i ostalih učesnika u saobraćaju.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

9/11. Da li je nadležna općinska služba okončala izradu liste prioriteta za sanaciju, rekonstrukciju i popravku dječijih i sportskih igrališta. Ako jeste, molim da se ista dostavi Općinskom vijeću na uvid. Također, da li je predviđeno da vijećnici imaju mogućnost dostavljanja prijedloga i dopuna liste, na osnovu potreba građana iz različitih naselja naše općine, prije njene konačne finalizacije.

Obrazloženje:

Tokom tekućeg mandata, značajan broj vijećničkih inicijativa odnosio se na potrebu za obnovom, sanacijom i rekonstrukcijom dječijih i sportskih igrališta na području naše općine, što jasno ukazuje na izražene potrebe građana, posebno najmlađih, za kvalitetnim i sigurnim prostorima za igru, sport i druženje. Iz nadležne općinske službe više puta je istaknuto da je u toku proces obilaska svih dječijih i sportskih igrališta s ciljem evidentiranja stanja na terenu, te izrade liste prioriteta za njihovu sanaciju, rekonstrukciju i nabavku novih mobilijara. Uzimajući u obzir važnost ove tematike i činjenicu da vijećnici kroz svakodnevnu komunikaciju s građanima prikupljaju konkretne prijedloge, sugestije i potrebe iz različitih mjesnih zajednica, postavljam sljedeće pitanje: Da li je nadležna općinska služba okončala izradu liste prioriteta za sanaciju, rekonstrukciju i popravku dječijih i sportskih igrališta? Ako jeste, molim da se ista dostavi Općinskom vijeću na uvid. Također, da li je predviđeno da vijećnici imaju mogućnost dostavljanja prijedloga i dopuna liste, na osnovu potreba građana iz različitih naselja naše općine, prije njene konačne finalizacije. Cilj ovog pitanja jeste da se obezbijedi transparentan i inkluzivan proces planiranja, te da se u obzir uzmu i lokalni prioriteti koje vijećnici prepoznaju kroz svakodnevnu komunikaciju s građanima.

9/12. U kojoj fazi se nalazi realizacija planirane izgradnje dječijeg igrališta u naselju Orahov Brijeg. Na općinskoj parceli u navedenom naselju, na kojoj je planirana izgradnja igrališta, u prethodnom periodu je vođen postupak cijepanja parcela u korist Općine Vogošća – u kojoj fazi se trenutno nalazi navedeni postupak.

Obrazloženje:

Na osnovu obraćanja značajnog broja građana iz naselja Orahov Brijeg, ukazujem na izraženu potrebu za izgradnjom dječijeg igrališta u ovom naselju. Trenutno u Orahovom

Brijegu ne postoji uređeno i namjenski opremljeno igralište, što predstavlja ozbiljan nedostatak s aspekta sigurnosti djece, njihove socijalizacije i kvalitetnog provođenja slobodnog vremena. Polazeći od činjenice da je osiguravanje adekvatnih uslova za rast i razvoj djece jedna od temeljnih obaveza lokalne zajednice, te imajući u vidu strateško opredjeljenje Općine Vogošća ka unapređenju kvaliteta života građana, smatram da je potrebno dobiti informaciju o statusu realizacije navedenih aktivnosti. Navedeno vijećničko pitanje postavljam iz razloga što u naselju Orahov Brijeg postoji realna i izražena potreba stanovnika za izgradnjom sigurnog i funkcionalnog prostora za djecu, što ujedno predstavlja i važan segment stvaranja kvalitetnijeg i zdravijeg životnog ambijenta u lokalnoj zajednici.

Vijećnik Piknjač Admir (u ime Kluba vijećnika NiP) postavio je slijedeća vijećnička pitanja:

9/13. Pitam nadležnu Općinsku službu kada će pokrenuti bilo kakavu potrebnu radnju (izradu projektne dokumentacije) za izgradnju kanalizacione mreže na teritoriji naselja Kremeš, obzirom da se prijedlog za izgradnju pomenute kanalizacione mreže nalazi već dvije godine u programu prioriteta komunalne infrastrukture.

9/14. Pitam nadležnu Općinsku službu kada će izvršiti podjelu kanti za prikupljanje i odvoz smeća na adresi Igmanska broj 1., MZ Hotonj, Općina Vogošća. Obrazloženje koje sam dobio od strane KJKP „RAD“ putem postavljene inicijative na 8. redovnoj sjednici Općinskog vijeća je neosnovano i tvrde da nemaju registrovanog korisnika na pomenutoj adresi, a računi za plaćanje usluge odvoza redovno dolaze.

Vijećnik Škoro Hamdija (u ime Kluba vijećnika Naprijed BiH) postavio je slijedeće vijećničko pitanje:

9/15. Kojim nevladinim organizacijama su dodjeljena ovogodišnja budžetska sredstva kao participacija realizacije njihovih projekata od značaja za općinu Vogošća, vezano za nedavno raspisani javni poziv za dodjelu ovih sredstava. Koliki iznos sredstava je svaka od tih organizacija dobila i za koje projekte. Molim nadležnu općinsku službu da mi u pisanom formatu dostavi tražene podatke iz vijećničkog pitanja.

Vijećnik Mehić Almedin (u ime Kluba vijećnika SDA) postavio je slijedeće vijećničko pitanje:

9/16. Postavljam pitanje nadležnoj Službi za investicije i komunalne poslove, a vezano za sjednicu koja je održana u januaru 2024. godine na kojoj je usvojena inicijativa o sanaciji prilaznog puta koji se nalazi iznad mezarja Orlić. Molim da mi odgovorite u kojoj fazi je navedena inicijativa. Do pristupnog puta je asfalt, dok je jedna kraća dionica blato, te je prilaz mezarju znatno otežan prilikom održavanja dženaza i obilaženja mezarja. Molim nadležne da riješe ovaj dugogodišnji problem.

Vijećnik Omerović Denis (u ime Kluba vijećnika SDP) postavio je slijedeća vijećnička pitanja:

9/17. Na dionici puta koja se proteže od ulice Kenana Brkanića 125., do džamije na Orahovom brijegu, cca 500 metara dužine, trenutno je vodosnabdijevanje privremeno riješeno pomoću plastičnih crijeva (tzv. šlafova). Ovakvo rješenje nije trajno, niti zadovoljava osnovne tehničke i sanitarne standarde, te postavljam pitanje, da li je planirano i kada povezivanje na glavni vodovod.

9/18. Postavljam pitanje na zahtjev građana ulice Stara željeznička stanica, u vezi sa Bunkerom u Semizovcu, koji se nalazi na listi evidentiranih dobara baštine Zavoda za zaštitu kulturno–historijskog i prirodnog naslijeđa Kantona Sarajevo, a koji se nalazi u vlasništvu Općine Vogošća. S obzirom na njegov značaj, a da je prostor toliko zarastao i prekriven šibljem, građani pitaju nadležne općinske službe da li će konačno početi voditi brigu o njegovom održavanju, te pitaju da li je mala kućica, koja je napravljena odmah uz Bunker, legalno ili nelegalno izgrađeni objekat.

Vijećnik **Pašić Edin (u ime Kluba vijećnika SDA)** postavio je slijedeće vijećnička pitanje:

9/19. Shodno obavijesti Ministarstva saobraćaja Kantona Sarajevo od 17.01.2025. godine, broj akta: 04-04-966/25, a koja se odnosi na pokrenutu inicijativu na 2. redovnoj sjednici Općinskog vijeća Vogošća u vezi sa modifikacijom linije Sutjeska-Orahov brijeg, upućujem pitanje Ministarstvu saobraćaja Kantona Sarajevo da li su poduzete određene aktivnosti u vezi inicijative, odnosno da li je Komisija za modifikaciju mreža linija javnog prijevoza putnika u Kantonu Sarajevo o istom dala mišljenje ili donijela određenu odluku.

Vijećnik **Gljiva Bego (u ime Kluba vijećnika S BiH)** postavio je slijedeće vijećničko pitanje:

9/20. Putem ovoga Vijeća, pokrenuo sam inicijativu za postavku rešetkastih metalnih slivnika koji nedostaju na saobraćajnici u ulici Orahov Brijeg broj 39. Stanovnici Orahovog brijega pitaju da li se planira vršiti postavka nedostajućih rešetki na slivnicima.

Vijećnik **Kulo Muamer (u ime Kluba vijećnika SDA)** postavio je slijedeća vijećnička pitanja:

9/21. U kojoj je fazi realizacija projekta izgradnje obaloutvrde na koritu rijeke Bosna, lokacija ul. Nova željeznička stanica, MZ Semizovac i kada se može očekivati nastavak radova.

9/22. Kada će započeti realizacija projekta izgradnje dječijeg igrališta na lokaciji dvorišta OŠ „Porodice ef. Ramić“, obzirom da je MZ Semizovac prikupila svu potrebnu dokumentaciju koja je vezana za lokaciju.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 29.08.2025.godine

**INICIJATIVE POKRENUTE
NA 9. REDOVNOJ SJEDNICI OPĆINSKOG VIJEĆA VOGOŠĆA
održanoj 28.08.2025. godine**

Na 9. redovnoj sjednici Općinskog vijeća vijećnik **Selimović Bego (u ime Kluba vijećnika SDA)** pokrenuo je slijedeće inicijative:

- 9/1.** U ime građana MZ Svrake pokrećem inicijativu putem nadležne službe prema Autocestama Federacije BiH da se riješi ulaz u naselje MZ Svrake sa Magistralnog puta Sarajevo-Tuzla, Tuzla- Sarajevo.

Obrazloženje:

Građani se svakodnevno obraćaju sa ovim pitanjem i neugodno se osjećaju, jer su udaljeni 10 km od glavnog grada države Bosne i Hercegovine, a praktično imaju dvije prepreke za normalan ulaz u naselje Svrake, a to su neriješen ulaz, jer se prolazi kroz benzinsku pumpu, gdje se vrlo često ne može proći i mora se čekati, a druga prepreka je most preko rijeke Bosne koji ima samo jednu traku. Podsjećam, usvojenim RP „Privredna zone Semizovac“ („Službene novine Federacije BiH“, broj: 40/19) predviđena je gradnja saobraćajnice sa četiri trake i dvije raskrsnice sa kružnim tokom u obuhvatu usvojenog planskog dokumenta. Naime, prva raskrsnica predviđena je na postojećem ulazu u kasarnu iz pravca Vogošće, dok je druga predviđena neposredno uz trenutnu benzinsku pumpu „Energopetrol“. Tom raskrsnicom predviđeno je i skretanje tj. ulaz i izlaz za naselje Svrake. Obzirom da bi se rješavanjem ovog pitanja ulazilo u državnu imovinu, mislim da će to ići lakše, jer je država za narod. Trebamo istrajati na prontnom rješavanju ove inicijative.

- 9/2.** U ime građana MZ Svrake pokrećem inicijativu putem nadležne službe prema Autocestama Federacije BiH da se na Magistralnom putu Sarajevo-Tuzla, Tuzla-Sarajevo obilježi znakom naselje Svrake.

Obrazloženje:

Za naselje Svrake znaju građani općine Vogošća, a ljudi koji dolaze i prolaze znaju za Svrake samo kad dođu u Krivoglavce i do mosta rijeke Bosna da pređu preko istog. Znakovno obilježavanje ovog naselja na magistralnom putu je nasušna potreba.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

- 9/3.** Pored vrtića „Trešnjica“ nalazi se borova šuma koja je jedinstvena u općini Vogošća, a neposredno se nalazi i dječije igralište koje ima posebno veliku posjećenost. Želim uputiti inicijativu da se u ovom području borove šume napravi park sa puno klupa i kružna šetnica, te da se tako ovo mjesto pretvori u oazu mira i relaksacije za naše građane.

- 9/4.** Zbog ogromnih gužvi automobila i zastoja na glavnoj saobraćajnici u Vogošći, a posebno se taj zastoj očituje na raskrsnici za izlazak i skretanje za Ugorsko, odnosno izlazak velikog broja automobila sa parkinga Binga, pokrećem inicijativu da se na toj raskrsnici napravi kružni tok, koji će ubrzati saobraćaj i smanjiti zagađenje vazduha zbog dugotrajnog zastoja automobila.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 9/5.** Pokrećem inicijativu prema Ministarstvu saobraćaja Kantona Sarajevo za izradu projektne dokumentacije i izgradnju tramvajske pruge do Vogošće. Izgradnjom tramvajske pruge bi se povezala općina Vogošća sa tramvajskim saobraćajem na području Kantona Sarajevo.

Obrazloženje:

Općina Vogošća nalazi se na udaljenosti od oko 8 km od centra Sarajeva, ali uprkos toj blizini nije povezana tramvajskim saobraćajem sa gradom. Vogošća je tranzitna općina kroz koju se ulazi u Sarajevo iz pravca Tuzle i Zenice, što dodatno naglašava njen strateški značaj. Radi poboljšanja saobraćajne komunikacije i smanjenja gužvi koje su dodatno pogoršane uvođenjem trolejskog saobraćaja, neophodno je da Ministarstvo saobraćaja Kantona Sarajevo u saradnji sa drugim nadležnim institucijama pokrene izradu projektne dokumentacije i izgradnju tramvajske pruge prema Vogošći. Pozitivni primjeri poput izgradnje tramvajske pruge prema Hrasnici, koja je udaljena oko 10 km od Ilidže i više od 20 km od centra Sarajeva, kao i plan za povezivanje naselja Dobrinja, pokazuju spremnost nadležnih da unaprijede javni prijevoz. Međutim, ostaje nejasno zašto do sada nije pokrenut projekat povezivanja Vogošće tramvajskim saobraćajem, posebno imajući u vidu činjenicu da je Vogošća nekada bila gradska općina, te da prema podacima CIPS-a ima oko 35.000 stanovnika, što je mnogo više od broja stanovnika Hrasnice. Zbog nedostatka tramvajske povezanosti između Vogošće i grada, građanima Vogošće otežana je komunikacija sa gradom iako se općina nalazi u neposrednoj blizini gradskih općina Grada Sarajeva. Izgradnjom tramvajske pruge na relaciji Sarajevo-Vogošća značajno bi se smanjile saobraćajne gužve, jer bi građani Vogošće mogli koristiti javni prijevoz koji bi im omogućavao bržu i jednostavniju komunikaciju, umjesto privatnih vozila pri odlasku u grad. Osim saobraćajnih benefita, realizacija ovog projekta doprinjela bi poboljšanju kvaliteta života, uklonila komunikacijsku barijeru, povećala atraktivnost općine za investiranje, te otvorila nove mogućnosti razvoja privrede.

- 9/6.** Pokrećem inicijativu prema Općinskom vijeću za izglasavanje odluke o zabrani otvaranja novih poslovnih jedinica sportskih kladionica i igara na sreću na području općine Vogošća.

Obrazloženje:

Masovno konzumiranje igara na sreću poznatije kao „kockanje“, postalo je ozbiljan problem koji sve više zahvata naše društvo. Broj ovisnika o kocki raste iz dana u dan, ostavljajući duboke posljedice na pojedince, porodicu i širu zajednicu. Kockanje nije samo lični problem, ono razara temelje društva. U velikom broju slučajeva, ovisnost o igrama na sreću vodi ka kriminalnim radnjama, narušava porodične odnose i ugrožava stabilnost porodice kao osnovne ćelije društva. Prema mišljenju stručnjaka, ovisnost o kocki spada među najteže oblike zavisnosti, često čak i teže od narkomanije. Iako ne možemo zabraniti rad postojećih poslovnih jedinica koje se bave ovom djelatnošću na području naše općine, smatramo da je moguće i nužno ograničiti daljnje širenje ove djelatnosti. Posebno zabrinjava činjenica da su mladi najizloženiji ovom obliku ovisnosti, što predstavlja ozbiljnu prijetnju budućnosti našeg društva. Zbog svega navedenog, predlažem da se preventivno djeluje kroz izglasavanje zabrane izdavanja odobrenja otvaranju novih poslovnih jedinica sportskih kladionica i igara na sreću na području općine Vogošća. Ovim potezom šaljemo jasnu poruku da je zdravlje i sigurnost naših građana, a naročito mladih, prioritet kojem se moramo posvetiti bez kompromisa.

Vijećnik **Gljiva Avdo (u ime Kluba vijećnika DF)** pokrenuo je slijedeće inicijative:

- 9/7.** Pokrećem inicijativu za postavljanje zaštitne ograde (bankine) u naselju Semizovac – Vranjak, na dionici od broja 8. do broja 54.

Obrazloženje:

Stanovnici ovog dijela naselja iznijeli su ozbiljne primjedbe na stanje puta, posebno u zimskom periodu kada je vožnja otežana i opasna. Radi se o uskoj i strmoj dionici puta uz koju sa jedne strane postoji duboka provalija, a nedostatak zaštitne ograde i bankine dodatno povećava rizik od nesreća. Usljed ovakvih okolnosti, građani su u svakodnevnom strahu za vlastitu sigurnost, kao i sigurnost djece i drugih učesnika u saobraćaju.

Zaključak: Tražim da nadležna služba izvrši procjenu terena i hitno postavi zaštitnu ogradu (bankinu) na ovoj dionici, kako bi se osigurala bezbjednost saobraćaja i stanovnika naselja Vranjak.

- 9/8.** Pokrećem inicijativu za obnovu i sanaciju dječijeg igrališta u ulici Igmanska. Lokacija: iza zgrada na adresi Igmanska br. 63 i 65 (između ulica Igmanska i Jošanička)

Obrazloženje:

Na igralištu iza zgrada u ulici Igmanska iza zgrada broj 63. i 65., kompletan mobilijar je dotrajavao i uništen. Sprave su razvaljene, neupotrebive i predstavljaju ozbiljnu opasnost za sigurnost djece. S obzirom da se radi o igralištu koje koriste brojni mališani iz ovog dijela naselja, neophodno je izvršiti kompletnu obnovu i postavljanje novog mobilijara, te po potrebi sanaciju podloge.

Vijećnik **Handžić Jasmin (u ime Kluba vijećnika SDA)** pokrenuo je slijedeće inicijative:

- 9/9.** Pokrećem inicijativu da Općina Vogošća, u saradnji sa nadležnim službama i boračkim udruženjima, realizuje postavljanje jarbola sa zastavom Armije Republike Bosne i Hercegovine na Centralno spomen-obilježje šehidima i poginulim borcima općine Vogošća.

Obrazloženje:

Zastava Armije R BiH je simbol hrabrosti, otpora i borbe za odbranu naše domovine od agresije. Patriote Općine Vogošća su u najtežim danima agresije na Bosnu i Hercegovinu dali nemjerljiv doprinos odbrani naše domovine. 412 šehida i poginulih boraca Armije Republike Bosne i Hercegovine sa ovog područja položili su svoje živote u temelje naše slobode i nezavisnosti. Centralno spomen-obilježje u Vogošći mjesto je gdje se okupljamo, sjećamo i odajemo počast onima koji su se u najtežim trenucima borili i izborili za slobodnu i nezavisnu Bosnu i Hercegovinu. Postavljanjem zastave na spomen-obilježje, na dostojanstven način odajemo počast svim šehidima i poginulim borcima Armije R BiH s područja Vogošće koji su dali svoje živote za slobodu i nezavisnost Bosne i Hercegovine.

- 9/10.** Pokrećem inicijativu uvođenje termina za rad sa strankama u cilju efikasnijeg rada uprave kojom predlažem uvođenje precizno definisanih termina za rad sa građanima u svim općinskim službama, kako bi se unaprijedila organizacija rada i povećala ukupna efikasnost uprave. Naime, praksa u mnogim općinama i institucijama pokazala je da jasno odvojeno vrijeme za prijem stranaka i vrijeme za nesmetan operativni rad službenika značajno doprinosi boljoj učinkovitosti u rješavanju predmeta i zahtjeva građana. Predlažem sljedeći model: Šalter sala (informacije, prijem zahtjeva i sl.) da bude dostupna građanima tokom cijelog radnog dana. Ostale službe primaju građane u unaprijed definisanom vremenskom okviru – npr. od 08⁰⁰ do 12⁰⁰ sati. Ostatak radnog dana (npr. od 12⁰⁰ do kraja radnog vremena) službe koriste isključivo za obradu predmeta, operativne i stručne zadatke, kao i po potrebi zakazane termine s građanima.

Obrazloženje:

Zaposleni u upravi, osim komunikacije sa strankama, svakodnevno rade na obradi zahtjeva, izradi akata, donošenju rješenja i drugim stručnim i administrativnim poslovima koji zahtijevaju koncentraciju i vrijeme. Neprestani dolasci stranaka u toku dana otežavaju pravovremenu i kvalitetnu obradu predmeta, što na kraju može dovesti do nezadovoljstva samih građana. Uvođenjem jasno definisanih termina: Obezbjeduje se kvalitetniji i posvećeniji prijem stranaka u tačno određenom vremenu. Povećava se efikasnost u rješavanju predmeta i zadataka. Omogućava se bolja organizacija rada i ravnomjernije opterećenje zaposlenika. Građani i dalje imaju dostupnost uslugama, ali uz bolju predvidivost i veću odgovornost uprave. Ovakav model rada već je prepoznat kao dobra praksa u brojnim jedinicama lokalne samouprave i institucijama, te vjerujem da bi dao konkretne rezultate i kod nas.

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeću inicijativu:

- 9/11.** Pokrećem inicijativu u ime građana ul. Branilaca Hotonja za hitno asfaltiranje makadamskog puta u ovoj ulici.

Obrazloženje:

Uređenje i asfaltiranje ove saobraćajnice već je planirano i usvojeno Budžetom Općine Vogošća za 2025. godinu. Ipak i pored obezbijeđenih sredstava, na terenu nije poduzeta nijedna konkretna aktivnost osim informacije da se izrađuje projektna dokumentacija. Mještani ovog područja godinama trpe otežano kretanje, naročito u lošim vremenskim uslovima, dok obećanja o asfaltiranju ostaju neispunjena. Navedeni put je prešao u nadležnost Općine, što znači da su ispunjeni svi formalni uslovi za početak radova. Daljnje odlaganje opravdano će se smatrati nebrigom i ignorisanjem potreba ovog dijela lokalne zajednice. Zahtijevam:

1. Da nadležna općinska služba u roku od 30 dana dostavi pisani izvještaj o statusu projekta, razlozima zastoja i preciznim datumima početka radova.
 2. Da se s obzirom na to da su sredstva već planirana budžetom, odmah pokrene realizacija radova bez daljnjih odgađanja.
 3. Da Općina javno informiše mještane o planu izvođenja radova i obaveže se na poštivanje utvrđenih rokova. Realizacijom ovog projekta Općina bi ispunila preuzetu obavezu i vratila povjerenje građana koje se godinama narušava zbog prolongiranja ovog pitanja.
- Napominjem da sam u cjelosti prenio inicijativu i zahtjeve onako kako su mi građani dostavili.

Vijećnik **Bogilović Enis (u ime Kluba vijećnika NiP)** pokrenuo je slijedeće inicijative:

- 9/12.** Pokrećem inicijativu da se u ulici Jošanička do broja 104., postave usporivači brzine zbog nesavjesnih vozača.
- 9/13.** Pokrećem inicijativu da se ploče sa nazivom ulica koja su oštećene saniraju, poprave ili zamjene. Da se u ulicama slijepi krak postave ploče naziva ulica sa brojevima od do. Npr. Kobilja Glava od 36. do 106.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

- 9/14.** Da se postave nadzorne kamere na autobuskim stajalištima u ulici Jošančka bb, potom na stajalištu u ulici Igmanska (kod pekare Aspek) i ulici Feriza Merzuka (autobuska okretaljka).

Obrazloženje:

Na navedenim autobuskim stajalištima se svakodnevno zadržavaju automobili i ometaju odvijanje javnog gradskog saobraćaja. Zadržavanjem i nepropisnim parkiranjem na pomenutim ulicama, posebno u ulici Braće Kršo kod pekare „Fortuna“, svakodnevno dolazi do problema u odvijanju saobraćaja, jer autobusi i trolejbusi ne mogu proći od automobila. Inicijativu upućujem nadležnom Ministarstvu unutrašnjih poslova Kantona Sarajevo. Fotografije dostavljam u prilogu.

- 9/15.** Da se obilježi ponovo pješački prijelaz „zebra“ i postavi svjetlosna signalizacija pješačkog prijelaza u mjestu Hotonj, na glavnoj magistrali kod restorana „AS“.

Obrazloženje:

Na pomenutoj lokaciji pješački prijelaz je izbrisan, odnosno trake su izbljedile, ne postoji signalizacija za pješački prijelaz. Upravo na tom dijelu magistrale djeca svakodnevno prelaze ulicu, jer je to put koji vodi do škole. Zbog sigurnosti djece i ostalih učesnika, veoma je važno da takva mjesta budu vidljiva svim učesnicima u saobraćaju, vozačima i pješacima. Fotografije dostavljam u prilogu.

Vijećnik **Cvrk Čamil (u ime Kluba vijećnika DF)** pokrenuo je slijedeću inicijativu:

- 9/16.** Pokrećem inicijativu za sanaciju uklonjenih metalnih rešetki na kanalima za odvod vode oko fontane na Trgu žrtava genocida u Srebrenici.

Obrazloženje:

Na pomenutoj lokaciji primijećeno je da je uklonjen značajan broj metalnih rešetki na kanalima za sliv vode koji su se nalazili oko fontane. Njihovo uklanjanje stvorilo je niz opasnosti za sigurnost građana, naročito djece. Otvoreni slivni kanali predstavljaju rizik od spoticanja, mogućih padova, te povreda – posebno kod male djece kojoj noga može lako upasti u otvor. Budući da se na ovom trgu svakodnevno okupljaju stotine djece, roditelja i drugih građana, nužno je što hitnije reagovati, izvršiti uviđaj na terenu i postaviti nove metalne kanalice ili izvršiti sanaciju postojećih otvora na bezbjedan način.

Vijećnik **Turković Faruk (u ime Kluba vijećnika SDA)** pokrenuo je slijedeće inicijative:

- 9/17.** Inicijativa za poboljšanje sistema odvoza komunalnog otpada na području Općine Vogošća. U ime građana nekoliko mjesnih zajednica na području općine Vogošća, obraćam vam se sa inicijativom za unapređenje usluga odvoza komunalnog otpada i rješavanje konkretnih problema koji već duže vrijeme stvaraju poteškoće stanovnicima.

1. Problem neredovnog odvoza smeća u naselju Kobilja Glava.

Građani Kobilje Glave suočavaju se sa čestim kašnjenjima i neredovnim odvozom smeća, što dovodi do stvaranja nehygijskih uslova i nezadovoljstva stanovnika. Dodatno, kod pasarele

se i dalje nalaze kontejnerske niše koje, po mišljenju većine stanovnika, više nisu potrebne, jer gotovo sva domaćinstva posjeduju kante za selektivno odlaganje otpada. Predlažem sljedeće:

- Razmotriti mogućnost uklanjanja postojećih kontejnera kod pasarele.
- Domaćinstvima koja još uvijek nemaju individualne kante omogućiti odlaganje otpada u kontejnere kod Pošte.
- Ukoliko se pokaže potreba za dodatnim kapacitetom, predlažem proširenje postojećih kontejnerskih niša kod Pošte postavljanjem nekoliko dodatnih kontejnera.

2. Problemi sa odvozom otpada u Mjesnoj zajednici Svrake.

MZ Svrake već duže vrijeme ima izražen problem neredovnog odvoza smeća iz individualnih kanti, dok kontejneri za zajedničko odlaganje uopće ne postoje. Građani, zbog nedostatka rješenja, često odlažu kabasti otpad na lokacijama gdje su nekada bile postavljene kontejnerske niše, što stvara divlje deponije i narušava izgled naselja. Predlažem sljedeće mjere:

- Uvođenje redovnog i pravovremenog odvoza otpada iz individualnih kanti.
- Organizaciju jednog dana mjesečno za odvoz kabastog otpada, kako bi se spriječilo njegovo nepropisno odlaganje na javnim površinama.
- Razmatranje mogućnosti vraćanja manjih kontejnera na strateške lokacije, kako bi se smanjila pojava divljih deponija.

3. Zahtjev za sistemsko rješenje na nivou cijele Općine Vogošća.

S obzirom na to da su slični problemi prisutni i u drugim naseljima Općine Vogošća, tražim od KJKP "RAD" Sarajevo da u saradnji s Općinom Vogošća pripremi plan unapređenja sistema odvoza otpada koji će uključivati:

- Poštovati definisane termine i redovno vršiti odvoz otpada,
- U saradnji sa Savjetima mjesnih zajednica razmotriti mogućnost ponovne izgradnje kontejnerskih niša na pojedinim lokacijama,
- te eventualno pojačavanje kapaciteta komunalnih ekipa na području naše općine.

Uvjeran sam da će se blagovremenim djelovanjem značajno poboljšati čistoća javnih površina, unaprijediti kvalitet života naših građana i spriječiti daljnje stvaranje divljih deponija.

9/18. Inicijativa za ubrzanje radova i osiguranje kontinuirane realizacije projekta "Prva transverzala".

U ime građana općine Vogošća, pokrećem ovu inicijativu kojom tražim hitnije i efikasnije djelovanje Ministarstva saobraćaja Kantona Sarajevo na realizaciji projekta "Prva transverzala", s posebnim fokusom na dionicu koja direktno utiče na saobraćajnu povezanost Općine Vogošća s ostatkom Kantona.

1. Važnost Prve transverzale za Općinu Vogošća

Projekat "Prva transverzala" od strateškog je značaja za Vogošću jer direktno utiče na:

- rasterećenje postojećih saobraćajnica, posebno magistralnog puta M-18,
- smanjenje svakodnevnih gužvi i zastoja u naseljima Hotonj, Blagovac i Kobilja Glava,
- poboljšanje povezanosti Vogošće s centrom Sarajeva i drugim dijelovima Kantona,
- privlačenje novih investicija i ubrzanje ekonomskog razvoja.

Zbog trenutne dinamike radova i čestih zastoja, građani Vogošće svakodnevno trpe posljedice, uključujući višesatna kašnjenja i otežano kretanje.

2. Problemi u realizaciji projekta

Građani su izrazili nezadovoljstvo zbog sporog tempa i čestih prekida radova na dionici koja prolazi kroz područje od Bare-Šip prema Hotonju. Kao rezultat, stvaraju se saobraćajni čepovi koji dovode do:

- dodatnog zagađenja zraka zbog produženog zadržavanja vozila,
- otežanog kretanja javnog prijevoza i hitnih službi,
- smanjenja sigurnosti učesnika u saobraćaju, posebno pješaka.

3. Prijedlog mjera Ministarstvu saobraćaja Kantona Sarajevo

Predlažem sljedeće korake kako bi se proces ubrzao i poboljšala koordinacija:

- Ubrzati dinamiku radova - osigurati dodatne izvođače i tehničke kapacitete radi brže realizacije ključnih dionica.
- Osigurati stalnu prisutnost nadzora na gradilištima - uvesti obaveznu svakodnevnu kontrolu izvođenja radova od strane nadzornog organa kako bi se izbjegla kašnjenja i osigurao kvalitet izvedenih radova.
- Intenzivirati saradnju sa JP Ceste F BiH i drugim institucijama - Bolja koordinacija sa JP Ceste F BiH i Općinom Vogošća radi rješavanja tehničkih i imovinsko-pravnih pitanja koja usporavaju projekat.
- Javna transparentnost i informisanje građana - Uvesti obavezu redovnog izvještavanja javnosti o napretku radova putem web stranice Ministarstva i društvenih mreža.

4. Dugoročna korist realizacije projekta

Završetak Prve transversale će:

- značajno skratiti vrijeme putovanja između Vogošće i centra Sarajeva,
- smanjiti gužve na postojećim saobraćajnicama,
- unaprijediti kvalitet zraka i životnu sredinu,
- povećati atraktivnost Vogošće za stanovanje, investiranje i razvoj turizma.

Smatram da je neophodno da Ministarstvo saobraćaja Kantona Sarajevo uloži maksimalne napore kako bi se projekat "Prva transversala" realizovao kontinuirano, bez nepotrebnih zastoja i da se prioritetno tretiraju dionice koje najviše utiču na saobraćajnu protočnost i kvalitet života građana Općine Vogošća.

Vijećnica **Šabić Dalia (u ime Kluba vijećnika DF)** pokrenula je slijedeću inicijativu:

9/19. Pokrećem inicijativu prema nadležnoj općinskoj službi i općinskoj inspekciji za hitnu sanaciju opasne neuređene građevinske rupe u ulici Omladinska kod zgrade br. 6.

Obrazloženje:

U ulici Omladinska, u neposrednoj blizini Trga žrtava Srebrenice i dječijeg parka, kod zgrade broj 6, još prije nekoliko mjeseci vršeni su određeni radovi nakon kojih je ostala duboka i neobezbijedena rupa. Do danas ta rupa nije zatrpana niti ograđena, čime predstavlja ozbiljnu opasnost da neko – posebno dijete – upadne i zadobije teške povrede. S obzirom na blizinu dječijeg igrališta i svakodnevnu prisutnost velikog broja djece i prolaznika, smatram da je neodgovorno ostavljanje ovakvog terena nedovršenim, te predlažem da nadležna općinska služba i inspekcija hitno izađu na teren, utvrde koja firma ili pojedinac je vršio radove, te da se naloži momentalna sanacija otvora, odnosno da se rupa zatrpa i površina vrati u prvobitno i bezbjedno stanje.

Vijećnica **Salčin Sabiha (u ime Kluba vijećnika SDA)** pokrenula je slijedeću inicijativu:

9/20. Pokrećem inicijativu prema nadležnoj Općinskoj službi, da se pokrenu aktivnosti na izradi Strategije razvoja poljoprivrede općine Vogošća.

Obrazloženje:

Poljoprivreda na području općine Vogošća ima značajan potencijal za razvoj, posebno u segmentima stočarstva, voćarstva i povrtlarstva. Trenutno Općina Vogošća ne posjeduje strateški dokument koji bi definisao pravac razvoja, podršku poljoprivrednicima i mjeru unaprijeđenja proizvodnje. Izradom Strategije omogućit će se:

- identifikacija poljoprivrednih resursa i potencijala općine,
- definisanje mjera za povećanje proizvodnje i konkurentnosti lokalnih poljoprivrednika
- uvođenje svaremenih tehnologija
- povezivanje poljoprivrede sa turizmom i lokalnim tržištem.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

9/21. Pokrećem inicijativu za izradu Programa gospodarenja poljoprivrednim zemljištem u državnom vlasništvu na području Općine Vogošća.

Obrazloženje:

U skladu sa odredbama Zakona o poljoprivrednom zemljištu Federacije Bosne i Hercegovine (Službene novine FBiH, broj 52/09), jedinice lokalne samouprave imaju obavezu donošenja Programa gospodarenja poljoprivrednim zemljištem u državnom vlasništvu. Ovaj program je ključni instrument za planiranje, zaštitu i korištenje ovog resursa od javnog interesa. Na području Općine Vogošća postoje površine poljoprivrednog zemljišta u državnom vlasništvu koje su trenutno neiskorištene, zapuštene ili se koriste bez pravne osnove. Donošenjem programa omogućilo bi se:

- transparentno i zakonito davanje zemljišta u zakup, putem javnog poziva,
- razvoj lokalne poljoprivrede i jačanje porodičnih gazdinstava,
- otvaranje mogućnosti za zapošljavanje i samozapošljavanje,
- zaštita zemljišta od nelegalne gradnje, zagađenja i degradacije

Posebno ističem primjere dobre prakse:

- Općina Novi Grad Sarajevo – usvojila je Program gospodarenja poljoprivrednim zemljištem, objavila javni poziv, te omogućila dugoročni zakup zemljišta lokalnim poljoprivrednicima. Program uključuje i mjere zaštite zemljišta te podršku za razvoj plasteničke i stočarske proizvodnje.

- Općina Ilijaš – aktivno provodi zakup zemljišta s ciljem razvoja voćarstva, pčelarstva i stočarstva, uz prioritet za mlade i registrovane poljoprivredne proizvođače.

Podsjećam da je Općina Vogošća tokom 2020. godine, kao odgovor na tadašnje okolnosti i potrebe građana, provela program kojim je omogućena dodjela općinskog zemljišta bez naknade osobama zainteresovanim za poljoprivrednu proizvodnju. Tada su lokaliteti Rosulje i Gornja Jošanica stavljeni na raspolaganje građanima za potrebe prolijetne sjetve. Program je podržan i odgovarajućim zaključkom Općinskog vijeća, čiji je cilj bio da se građanima bez vlastitih parcela omogući privremeno korištenje zemljišta za uzgoj hrane i druge poljoprivredne aktivnosti što se u praksi pokazalo kao dobar potez. Smatram da i Općina Vogošća treba slijediti ovaj primjer, koristeći sve zakonske mogućnosti za jačanje lokalne poljoprivredne proizvodnje i odgovorno upravljanje zemljišnim resursima.

9/22. Pokrećem inicijativu prema Policijskoj upravi Vogošća za uklanjanje neregistrovanih motornih vozila sa javnih parking površina u ulicama Vogošćanskih odreda, Feriza Merzuka i Spasoja Blagovčanina.

Obrazloženje:

Građani više naselja na području Općine Vogošća svakodnevno se suočavaju sa problemom nedostatka parking prostora. Povećan broj vozila u saobraćaju, nedostatak novih parking kapaciteta, ali i činjenica da su postojeća parking mjesta često zauzeta od strane neregistrovanih, napuštenih i tehnički neispravnih vozila, doveli su do situacije da se stanovnici teško snalaze u obavljanju svojih svakodnevni obaveza. Ovakvo stanje proizvodi nekoliko problema:

- Smanjuje se broj raspoloživih parking mjesta za vozila koja su u svakodnevnoj upotrebi, što dodatno opterećuje građane u naseljima koja se već bore s hroničnim nedostatkom parking prostora.
- Neregistrovana i napuštena vozila narušavaju izgled naselja i stvaraju lošu sliku o komunalnom redu.
- Takva vozila mogu predstavljati sigurnosni rizik, kako u smislu saobraćajne sigurnosti, tako i u pogledu potencijalnog odlaganja otpada u njih, pa čak i opasnosti od požara.

Imajući u vidu navedeno, upućujem navedenu vijećničku inicijativu Policijskoj upravi Vogošća da, u skladu sa važećim zakonskim propisima, poduzme mjere uklanjanja neregistrovanih i napuštenih motornih vozila sa javnih parking površina i ulica. Ova inicijativa ima za cilj:

- Oslobođanje javnih parking mjesta i rasterećenje postojećih kapaciteta.
- Poboljšanje komunalnog reda i sigurnosti u naseljima.
- Stvaranje urednijeg, sigurnijeg i funkcionalnijeg životnog prostora za građane.

Smještanjem ovakvih vozila na neodgovarajuća mjesta dodatno se usložnjava svakodnevni život stanovnika, pa je neophodno hitno djelovati i ovaj problem sistemski riješiti.

Vijećnik **Piknjač Admir (u ime Kluba vijećnika NiP)** pokrenuo je slijedeću inicijativu:

9/23 Pokrećem inicijativu koja se odnosi za pokretanje postupka legalizacije bespravno izgrađenih objekata na području Općine Vogošća. Na osnovu Poslovnika o radu Općinskog vijeća Vogošća, a u skladu sa Statutom Općine Vogošća, podnosim ovu inicijativu kojom predlažem da Općinsko vijeće Vogošća pokrene postupak sistemske legalizacije bespravno izgrađenih objekata na teritoriji općine Vogošća.

Obrazloženje:

Na teritoriji općine Vogošća je veliki broj bespravno izgrađenih objekata, jer smo svjedoci duži niz godina povećanog naseljavanja i potrebe za rješavanjem stambenog pitanja stanovnika naše Općine. Većina takvih objekata kako kolektivne (zgrade), tako i individualne izgradnje građeni su bez urbanističke, građevinske i druge dokumentacije, a njihovi vlasnici danas nemaju pravnu sigurnost u pogledu imovine, niti pristupa osnovnim komunalnim i infrastrukturnim uslugama. Naročito vlasnici stanova u zgradama bez navedene dokumentacije. Cilj ove inicijative je pritisak na nadležne institucije viših nivoa vlasti za usvajanje zakona o legalizaciji bespravno izgrađenih objekata na području Kantona Sarajevo. Nakon toga izvršiti uvođenje bespravno izgrađenih objekata kroz pravni sistem, odnosno sam proces legalizacije. Napraviti evidenciju bespravno izgrađenih objekata. Provedbom legalizacije došlo bi do povećanja prihoda budžeta Općine Vogošća kroz naplatu naknada i poreza, te svakako treba uvesti mogućnost olakšica prilikom plaćanja za određene kategorije stanovnika. Povećala bi se i pravna sigurnost kao i kvalitet života građana kroz legalizaciju priključaka na komunalnu infrastrukturu i mnogi drugi benefiti koje bi dobili i građani i Općina Vogošća.

Vijećnik **Gljiva Eno (u ime Kluba vijećnika DF)** pokrenuo je slijedeću inicijativu:

9/24. Pokrećem inicijativu za hitnu sanaciju kvara i curenja vode u Donjoj Jošanici I, broj 4.

Obrazloženje:

Na osnovu svakodnevnih prijava građana i uvida na terenu, podnosim inicijativu prema KJKP "Vodovod i kanalizacija" u vezi s dugotrajnim curenjem vode ispred stambenog objekta na adresi Donja Jošanica I, broj 4. Na toj lokaciji voda curi već duži vremenski period, što stvara stalne probleme za stanovnike i prolaznike. Osim očiglednog gubitka pitke vode, dodatni problem predstavlja stvaranje potencijalno opasnih uslova na kolovozu, naročito u zimskom periodu kada dolazi do zamrzavanja. Ovakva situacija može dovesti do poledice na cesti, što predstavlja direktnu prijetnju sigurnosti pješaka i učesnika u saobraćaju, kao i mogućnost nastanka materijalne štete i nesreća.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

9/25. Pokrećem inicijativu da se tabla sa putokazima koja se nalazi ispred zgrade u ulici Spasoja Blagovčanina broj 20., izmjesti u blizinu kružnog toka i na vidno mjesto.

Obrazloženje:

Pomenuta tabla se nalazi odmah uz zgradu i ne služi svojoj svrsi. Obzirom na položaj iste učesnici u saobraćaju ne mogu dobiti informacije, jer je previše odmaknuta od ceste uz zgradu i uz to je zarasla.

9/26. Pokrećem inicijativu da služba u saradnji sa nadležnim ministarstvom pokuša iznaći način da se semafori koji se nalaze na ulazu i izlazu u Ugorsko tokom jutarnje i popodnevne špice regulišu na način da samo bude uključeno trepteće svjetlo.

Obrazloženje:

Obzirom da se tokom špice stvaraju ogromne gužve na izlazu i ulazu na pomenutoj raskrsnici, gašenjem semafora tokom špica dovelo bi do rastrećenja saobraćaja u ovom dijelu Vogošće.

Vijećnik **Mehić Almedin (u ime Kluba vijećnika SDA)** pokrenuo je slijedeće inicijative:

9/27. Pokrećem inicijativu koja se konkretno odnosi na ponašanje pojedinih neodgovornih lica koji dolaze, borave i koriste sprave na Trgu žrtava genocida u Srebrenici koji se nalaze neposredno pored sportske dvorane „Amel Bečković“. Naime, svjedoci smo ponašanja pojedinih osoba koji ne poštuju pravila ponašanja koja su istaknuta na tablama, a koje su postavljene na lokalitetima kod fontane. Istina je da su neke table izbljebile i ne može se tačno vidjeti pravila ponašanja, ali većina ih je ispravna i vidljiva. Molim nadležne da se u što skorijem periodu postave novi znakovi upozorenja i obavijesti, kako bi lica koja se nedolično ponašaju mogla biti sankcionisana po zakonom predviđenim mjerama.

9/28. Prije par mjeseci na pojedinim lokacijama u našoj općini postavljeni su elektromedicinski uređaji za kardioverziju srca ili poznatiji kao defibrilatori. Tim povodom želim pokrenuti inicijativu prema nadležnim za obuku koju bi provodili konkretno sa sportskim klubovima, odnosno njihovim članovima koji koriste resurse sportske dvorane „Amel Bečković“, kako bi svi znali rukovati navedenim uređajem. Da li bi to bilo medicinsko osoblje Crvenog krsta Općine Vogošća ili osoblje DZ Vogošća, to ostavljam struci na dogovoru.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

9/29. Pokrećem inicijativu nadležnim službama za jačanje kadrovskih kapaciteta u Službi hitne pomoći Vogošća.

Obrazloženje:

Ovu inicijativu pokrećem polazeći od čestih pritužbi građana, kao i uočenih problema u radu Službe hitne pomoći Vogošća, koja djeluje u sklopu Doma zdravlja Vogošća, a posebno u večernjim satima i tokom noćnih smjena kada vrlo često dolazi do situacija da cjelokupni tim hitne pomoći izađe na teren radi pružanja pomoći na intervencijama i kućnim posjetama. U tim trenucima prostorije hitne pomoći ostaju bez medicinskog osoblja po jedan, dva, pa i tri sata. Zbog toga veliki broj građana kojima je hitna medicinska pomoć nužno potrebna ostaje bez adekvatne podrške, u međuvremenu se stvaraju gužve i narušava se kvalitet pružanja zdravstvene usluge. Stoga predlažem da se u okviru organizacije rada Službe hitne pomoći

Vogošća osigura dodatno ljudstvo u večernjim satima i noćnim smjenama, kako bi se obezbijedilo da uvijek jedan doktor i jedan medicinski tehničar ostanu u prostorijama hitne pomoći kada drugi tim izađe na teren. Ova inicijativa ne dovodi u pitanje rad i uslugu doktora i osoblja, već ima za cilj bolju organizaciju i stalnu dostupnost hitne medicinske pomoći građanima i pravovremeno reagovanje u situacijama kada je svaka minuta važna.

9/30. Pokrećem inicijativu nadležnim organima za podjelu kanti za smeće u ulici Hilme Krke.

Obrazloženje:

Na zahtjev građana ulice Hilme Krke pokrećem inicijativu da se izvrši podjela individualnih kanti za smeće domaćinstvima u ovoj ulici. Trenutno, zbog nedostatka dovoljnog broja kontejnera za smeće, otpad se često odlaže na neadekvatan način, što stvara probleme sa čistoćom i higijenom u naselju. Podjelom kanti osiguralo bi se pravilno prikupljanje otpada, uredniji izgled ulice i unaprijedila bi se ukupna komunalna usluga. Predlažem da nadležne službe Općine Vogošća u saradnji sa KJKP „Rad“ pokrenu proceduru i u što skorijem roku izvrše distribuciju kanti stanovnicima ulice Hilme Krke.

Vijećnik Čomaga Almedina (u ime Kluba vijećnika SDA) pokrenula je slijedeću inicijativu:

9/31. Pokrećem inicijativu prema Ministarstvu unutrašnjih poslova Kantona Sarajevo za postavljanje kamere u cilju smanjenja nepropisnog parkiranja i zaustavljanja motornih vozila na saobraćajnici u ulici Spasoje Blagovčanina, kod tržnice-pijace Vogošća.

Obrazloženje:

Svjedoci smo već duži niz godina konstantnog nepropisnog i bahatog parkiranja vozila na pomenutoj lokaciji, gdje se stvaraju ogromne gužve zbog pojedinaca koji imaju naviku parkirati vozilo i obavljati svakodnevne aktivnosti odlaska u obližnje trgovine i objekte koji se tu nalaze. Također, zbog stvaranja gužvi nerijetko dolazi i do netrpeljivosti vozača i manjih prepirki i incidenata. Ova ulica je izuzetno prometna, jer spaja veliki dio naselja koji se tu nalaze, a i zbog samog lokaliteta koji se nalazi u centru naše općine. Iz tog razloga smatram da je u ovom dijelu neophodno postavljanje kamere koja će imati cilj smanjenje broja nepropisno parkiranih vozila, pratiti i eventualno novčano kazniti svakog pojedinca koji napravi taj prekršaj.

Vijećnik Pašić Edin (u ime Kluba vijećnika SDA) pokrenuo je slijedeću inicijativu:

9/32. Pokrećem inicijativu prema Općini, odnosno Službi za privredu, integrisani lokalni razvoj i društvene djelatnosti, na zahtjev određenog broja učesnika da od naredne godine učesnike biciklističkog maratona Bihać-Srebrenica, Općina Vogošća oficijelno isprati i pozdravi kroz simboličan performans na Trgu žrtava genocida u Srebrenici.

Obrazloženje:

Biciklistički maraton je događaj posvećen čuvanju kolektivnog sjećanja na genocid počinjen u Srebrenici koji okuplja veliki broj učesnika iz zemlje i inostranstva. Već godinama III etapa biciklističkog maratona polazi iz Vogošće, odnosno Semizovca (benzinska pumpa Bešlić), te smatram da bi ispraćaj dostojanstveno bio upotpunjen kada bi isti bio podržan i ispraćen oficijelno od strane Općine, kroz simboličan performans intoniranjem himne, minutom šutnje i učenjem fatihe. I pored svih drugih događaja u danima sjećanja na žrtve genocida smatram da se podrškom „biciklističkom putu sjećanja“ dodatno doprinosi značaju sjećanja na genocid.

Vijećnik Gljiva Bego (u ime Kluba vijećnika NiP) pokrenuo je slijedeće inicijative:

9/33. Da se u naselju Nova Vogošća na raskrsnici iznad marketa Amko Komerc izvrši postavljanje usporivača brzine na kom će biti obilježen pješački prijelaz ili postavljanje vibracionih traka sa obilježenim pješačkim prijelazom.

Obrazloženje:

Razlog ove inicijative je povećanje sigurnosti pješaka, posebno djece i starih osoba, s obzirom na to da se radi o ulici kojom se svakodnevno kreće veći broj građana. Naselje Nova Vogošća je u stalnom razvoju što dodatno povećava protok ljudi i vozila u ovoj ulici. Posebno treba istaći da je u ovoj ulici nedavno otvoren market Amko Komerc zbog čega veliki broj građana svakodnevno prelazi saobraćajnicu upravo na toj lokaciji. Brzina kretanja vozila često premašuje dozvoljene granice, pa bi postavljanje ležećeg policajca u kombinaciji sa pješačkim prijelazom značajno doprinjelo smanjenju rizika od saobraćajnih nezgoda. Molim nadležnu službu da razmotri ovu inicijativu, provede potrebne procedure i omogućiti njenu eventualnu realizaciju.

9/34. Na osnovu primjedbi građana i uočenom problemu na ulazu u naselje Blagovac prije i poslije servisa „Zike“, a u saradnji sa stanovnicima tog dijela pokrećem inicijativu da se izvrši čišćenje kanala za odvod otpadnih voda.

Obrazloženje:

Naime, kanal je duži vremenski period zapušten, pun nanosa zemlje i smeća kao i drugog otpadnog materijala što onemogućava normalan protok vode. Ovakvo stanje predstavlja ozbiljan problem, što može dovesti do potpunog začepljenja i izlivanja otpadnih voda na saobraćajnicu.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir